

ԱՆՏԻՊ ԷԶԵՐ ԱՐՇԱԿ ՖԵԹՎԱԾՅԱՆԻ ԱՐԽԻՎԻՑ

ՀՈՒՓՍԻՄԵ ԴԱՅԱՆ

*Հայաստանի գեղարվեստի պետական ակադեմիա
Հայաստանի ազգային պատկերասրահ
hp.dayan@yandex.ru*

ՀՏԴ՝ 7.071.1

DOI:10.54503/1829-4278.2023.2-48

Ամփոփագիր

Սույն հոդվածում առաջին անգամ ներկայացվում են Արշակ Ֆեթվաձյանի կյանքին և ստեղծագործությանն առնչվող արխիվային նյութեր, այդ թվում անտիպ, որոնք նորովի կբացահայտեն նրան որպես գիտնական, մտածող, հասարակական գործիչ և հայ մշակույթի հետազոտող: Նրա՝ Հայկական Լեռնաշխարհում դեգերումների արդյունք են շուրջ 2000 տարբեր աշխատանքներ Հայաստանի ավերակների ու հուշարձանների, հայ կանանց կերպարների և զարդանկարների մասին, որոնք 20-րդ դարի առաջին կեսին ներկայացվեցին Եվրոպայի, իսկ հետո՝ Միացյալ Նահանգների լավագույն ցուցասրահներում: Արշակ Ֆեթվաձյանը ականատեսն էր եղեռնյան և հետեղեռնյան ծավալվող դեպքերի, որոնց նկատմամբ իր վերաբերմունքը արտահայտել է ոչ միայն իր հոդվածներում. նա աջակցություն է կազմակերպել Եղեռնից փրկված որբերին ու կարիքավորներին: Այս հոդվածում ներկայացվում է նաև Ֆեթվաձյանի ամերիկյան շրջանի ստեղծագործական ձեռքբերումները, որպես մտածող, գիտնական, նրա հայրենիք վերադառնալու փափագը ու փորձերը: Հոդվածում տեղ են գտել նաև Ֆեթվաձյանին տրված գնահատականներն ու որակումները, որոնք առանձնացվել են գիտնական-արվեստագետի մասին Միացյալ Նահանգներում տպագրված հոդվածներից և նրա մասին հուշերից:

Բանալի բառեր. Արշակ Ֆեթվաձյան, 1915 թ. Հայոց ցեղասպանություն, Արշակ Ֆեթվաձյանը Միացյալ Նահանգներում, Հայկական Լեռնաշխարհ, հայ ձարտարապետական հուշարձանները կերպարվեստում, ջրաներկ, «Մանուկ Հայաստանի» կերպարը

«Գեղարուեստը կեանքի աղն է»

«Տէր, եթէ զշրթոնս իմ բանաս, բերան իմ երգեսցէ զօրհնութիւնս քո»

Արշակ Ֆեթվաճյանը (1863–1947) եզակի արվեստագետ, գիտնական, մտածող էր։ Նրա ստեղծագործական ներուժը, նորը բացահայտելու, ձանաչելու մշտաբեր ձգտումը, թողած ահռելի գիտական և ստեղծագործական ժառանգությունը բացառիկ են հայ արվեստում իրենց ծավալով և բնույթով։ Արվեստագետի մահից հետո գիտական և ստեղծագործական աշխատանքները կտակի համաձայն հանձնվել են Հայաստանի ազգային պատկերասրահ, որտեղ Հուշաձեռագրային բաժնում պահվում են Ֆեթվաճյանի կյանքին, գիտական և ստեղծագործական գործունեությանը վերաբերող հարուստ նյութեր։ Ֆեթվաճյանի ստեղծագործական ժառանգության որոշակի հարցերի ուսումնասիրությանն անդրադարձել են Գ. Չեմենյանը, Լ. Չուգասզյանը, Ա. Տեր-Մանուկյանը, Ռ. Շիշմանյանը և Բ. Երկանյանը՝ կատարելով կարևորագույն ներդրում վաստակաշատ արվեստագետի թողած ժառանգությունը հասարակության լայն շերտերին հասու դարձնելու համար։

Սույն հոդվածում առաջին անգամ կփորձենք ներկայացնել մեծ հայի կյանքը և ստեղծագործական ժառանգությունը՝ համաձայն պահվող փաստաթղթերի։

280-ամյա պատմություն ունեցող երզնկացի, ազնվական տոհմից սերված Արշակ Ֆեթվաճյանը նախնական կրթությունը ստացել է իր ծննդավայրում՝ «բանաստեղծական Տրապիզոնում»² և նկարել հինգ տարեկանից։ «Իմ պատանության երազ տարիները»³ անցել են Կոստանդնուպոլսում՝ Ռոբերտո քոլեջում ուսանելիս, որտեղ նա տիրապետել է դասական հայերենին, ֆրանսերենին, թուրքերենին։ Տասնինը տարեկանում Ֆեթվաճյանը դարձել է Կոստանդնուպոլսում բացված արվեստի կայսերական դպրոցի առաջին ուսանողներից։ Նկարչությունում ցուցաբերած գերազանց արդյունքի համար արժանացել է մեդալի, իսկ բարձր դասարանում ստացել Աբդուլ Համիդի ամեն տարի Կայսերական դպրոց ուղարկված հիսուն ոսկուց իր բաժինը։ 1887 թվա-

1 Տե՛ս Գրականության ցանկը։

2 **Ֆեթվաճեան Ա.**, «Մանուկ Հայաստան»-ի առթիւ, *Հայաստանի կոչնակ*, Նիւ եորք, 29.09.1923։

3 Նույն տեղում։

կանին մեկնել է Իտալիա՝ Հռոմ, ընդունվել Արվեստի թագավորական ինստիտուտ, սովորել չորս տարի՝ մասնագիտանալով գեղանկարչության մեջ, սերտել իտալերեն ու տիրապետել նույնքան սահուն, որքան հայերենը և ապրել «առաջին երիտասարդությանս բաբախուն խանդավառությունները»⁴: Հռոմում նշանակվել է Թուրքիայի դեսպանատան կցորդ, որի պաշտոնում ծառայել է երկու տարի⁵: 1892 թվին մեկնել է Վիեննա և մնացել այնտեղ մինչև 1895 թիվը: Այնուհետև՝ Ֆրանսիա, Գերմանիա, ապա՝ վերադարձ Ռուսաստան:

1896–1904 թթ. Ֆեթվաձյանն անցկացնում է Սանկտ Պետերբուրգում՝ պարբերաբար այցելելով Բաթումի՝ մորը, որը մահացավ 1900 թվականին⁷: «1899-ի դեկտեմբերի վերջերին էր, երբ ես Պետերբուրգից եկայ առաջին անգամ Թիֆլիզ՝ մտադրություն ունենալով կազմակերպել այնտեղ իմ նկարների ցուցահանդեսը: Թիֆլիզում ես ոչ մի ծանոթ ունեի, անգամ հայերի մէջ»⁸: Արվեստագետն այնտեղ ծանոթանում է Կովկասի փոխարքայի՝ իշխան Գոլիցինի հետ, ով թագավորական ընդունելություն է կազմակերպում և ռազմական թանգարանում տարածք է տրամադրում, որտեղ Ֆեթվաձյանը հնարավորություն է ունենում վեց շաբաթ շարունակ ցուցադրելու իր աշխատանքները: Արվեստագետն ապշած էր այն ջերմ ու խանդավառ ընդունելությունից, որը նրան մատուցեցին Գոլիցինը և ամբողջ Թիֆլիսը⁹:

1900 թվականի հուլիսի վերջին պարոն Ֆեթվան, ինչպես ինքն էր իրեն անվանում¹⁰, առաջին անգամ գալիս է Հայաստան: Ֆեթվաձյանը, հիշելով եվրոպական երկրների մայրաքաղաքներում ու բարձրաշխարհիկ հասարակությունում անցկացրած «լաւ բաները գնահատե-

4 Ֆեթվաձեան Ա., «Մանուկ Հայաստան»-ի առթիւ...:

5 Noted Artist Complies Monumental Work, Fetvajian To Lecture On Archeology. By a staff correspondent of the Hairenik Weekly, *Hairenik Weekly*, Boston, 6.12.1935.

6 Ֆեթվաձյանը Պետերբուրգում հայտնի դարձավ որպես ջրաներկերի վարպետ, ընտրվեց «Արվեստագետների խրախուսման Կայսերական Միության» անդամ և մասնակցեց ռուս ջրանկարիչների ցուցահանդեսներին: Տե՛ս **Basmadjian K. J.**, Un maitre arménien, Archag Fétvadjian, L'orient illustre, Paris, 25.07.1929.

7 Noted artist complies...:

8 Ֆեթվաձեան Ա., Իմ հանդիպումները Խրիմեանի հետ (I), *Հայրենիք*, Պոսթոն, 13.11.1932:

9 Noted artist complies...:

10 Paintings in the Metropolitan work of famous artist who won distinction in Europe. *Leominster daily enterprise*, Leominster, Mass., 18.5.1929.

յու կարողութեանա հասունութեան տասնեակ այլ տարիներ», նշում է, որ «բոլորը, բոլորը խունացան, գորշացան միանգամայն 1900-ի Յուլիս ամսի այն յաւէտ անմոռանալի գեղեցիկ առաւօտից, երբ «Թիֆլիզ-Ալեքսանդրօբոյ» գնացքը, հեւ ի հեւ վերելքով, անցաւ Ձորագետի դիպական հովտէն եւ կանգ առաւ Շիրակի դաշտում»¹¹: Օտար ավերում կրթված, ապրած և գործունեություն ծավալած 36 տարեկան երիտասարդի մեջ «ձայն տվեց Հայի արժանապատուութիւնը, ինքնայարգութիւնը»¹²: Նա որոշում է վեր հանել հայության արժեքները իմացողների և չիմացողների համար և հետևելով իր մեծ ուսուցչի՝ պրոֆեսոր Չեզարե Մաքքարիի խորհրդին՝ «Եվրոպա վերադառնալիս բերել իրենց մեր երկրից այն, ինչ որ մերն է և արևմտյայք դեռ չէին գիտցել»¹³, որը ինչ նրանից առաջ, ինչ հետո ոչ մեկը չարեց:

Երեք ամիս շարունակ Միսիթարյան երկու վարդապետների ընկերակցությամբ¹⁴ ձամփորդում է Էջմիածին, Կարս, Անի, Արագած՝ նկարելով մինչև XIII դարի հուշարձանների բազմաթիվ՝ ընդհանուր առմամբ 2000 մատիտանկար, ջրանկար, ձեպանկար: Քսանհինգ տարվա բացակայությունից հետո Հառիձավանքում հանդիպում է Ամենայն Հայոց Կաթողիկոս Մկրտիչ Խրիմյանին¹⁵: Այս հանդիպումից հետո Ֆեթվաձյանն ավելի է համոզվում իր առաքելության մեջ և խոստովանում, որ օտարության մեջ իր տեսած, ապրած բոլոր բաները նրան ավելի հեռու են սկսում թվալ, և նա հստակ սկսում է գիտակցել, թե որն է մերը և որը ուրիշինը: Հայաստան ձամփորդելը շրջադարձային եղավ Ֆեթվաձյանի կյանքում. սկսվում է նրա հայագիտական ու հնագիտական ուսումնասիրությունների շրջանը: Յուրաքանչյուր տարի նա շրջում է Արևելյան Հայաստանում «առանց յոգնելու, առանց տրտնջալու, բոլորովին

11 **Ֆեթվաձեան Ա.**, «Մանուկ Հայաստան»-ի առթիւ...:

12 **Մանուկեան Ա. Տ.**, Նկարիչ Արշակ Ֆետվաձեան, Արշակ Ֆետվաձեանի կենսագրութիւնը, Պարոն Ֆեթվաձեանի գեղարուեստից ուսումնարանի վերջին տարին եւ իր բարերարը, Պեյրութ, Տպարան Սեւան, 1966, էջ 52:

13 **Ֆեթվաձեան Ա.**, Կ. Խաչ պատմութեան համար (Կ. Խաչի 25-ամեակի առթիւ), *Հայրենիք*, Պոսթոն, 06.03.1935:

14 Հ. Գաբրիել վարտապետ Նահապետեան և Հ. Սարգիս Յովսեփեան (Հ. Դ.)

15 «Այդինչպէս է որ տասնեակ տարիներ եւրոպաները, հեռաւոր Ռուսաստանները ոտի տակ տուիր ու մէկ անգամ չմտածեցիր գալ Էջմիածին: Ես սպասեցի շատ, եւ յուսացի, որ օր մը կուգաս: Ես քեզի պէտք ունիմ»: Աղբյուրը՝ **Ֆեթվաձեան Ա.**, Իմ հանդիպումները...:

մինակ, ապալինելով միայն իր ուժերուն եւ աղբիւրներուն, ուսումնասիրելու, նկարելու կամ գծագրելու համար, անհուն համբերութեամբ, բծախնդիր ձգքոտութեամբ: 1900-ի և 1901-ի ամառները մասնաւորապէս ձամբորդեցի Ռուսական Հայաստանի մի կարևոր մասը: Յատուկ նպատակս էր փնտռել և գիտենալ, թէ ժամանակին «հայ քաղքենու» և «հայ արխատկրատի» բնակարանները ինչպէս մի բան են եղել: «Հայ գիւղացու տունը ամեն տեղ անփոփոխ այնպէս է մնացել՝ ինչպէս որ Քսենոփոն իր համբաւաւոր «Տասն հազարից նահանջի» մէջ նկարագրած է 2000 տարիներ առաջ...: Հետաքրքրւողներուն կը յանձնարարեմ կարդալ մեր երիտասարդ գիտնական Մեսրոպը վարդապետ Տէր-Մովսէսեանի «Հայ գիւղական տունը» գրվածքը, տպված 1892-ին Վիէնայի Մխիթարեանց մօտ¹⁶: Ուղևորության ընթացքում նա կանգ է առնում Ալեքսանդրապոլ, Կարս, Երևան քաղաքներում, Շիրակի, Արագածոտնի, Ապարանի դաշտերում և Արարատյան դաշտավայրում, «որոնց մէջ բնաւ մի հին «մասնաւորի բնակարան» թէկուզ ակերակ, չի կայ»¹⁷, ուսումնասիրում է գյուղերում, մերձակայքում առկա յուրաքանչյուր խոնարհված հուշարձան¹⁸: 1901 թվականի ամռանը ազգագրական ուսումնասիրության նպատակով Ֆեթվաձեանը, Արագածի լանջերին թափառելով, հանդիպում է իր «Սասունցի կինը» («Մանուկ Հայաստան»՝ 89x109 սմ, թուղթ, ջրանկար) ստեղծագործության հերոսուհուն: «Վեհօրէն հոյակապ մի աղջիկ: [...] Հոռիկու ինչպէս մի էգ վագր, առողջ ու մեծղի կնոջ մարմնին յատուկ շնորհալի մի դիրքով գրաւիչ՝ թէք ընկած էր նա քարափի եզերքին մի յարմար տեղ եւ, դիեցնում էր մի՛ իրեն համապատասխան անուշիկ փափիկ կորին, մի մանչ՝ աւելի հրաշագեղ քան ես կարողացայ արտայայտել իմ նկարում: Մնց ու դարձի տեղ չէր այնտեղ եւ իմ անսպասելի երեւումից նա հաւաքուեց առանց հեռացնելու երախայն իւր կենսալի կրծքից»¹⁹: Մանկանը կրծքին սեղմած, ամեն ինչ կորցրած սասունցի դյուցազնուհին խորհրդանշում է հանուն իր ապագայի ոտքի ելած ժողովրդի ազատագրական պայքարը²⁰: Նկարը վրձնեց 1903

16 **Ֆեթվաձեան Ա.**, Գեղարուեստը հայերի մէջ, *Մշակ*, Թիֆլիս, 04.07.1902:

17 Նույն տեղում:

18 «Ֆեթվաձեանի Կենտրոնական Յոբելյանական հանձնախումբը Նյու Յորքում գրեց Ֆեթվաձեանի գործի կարևորությունն ու նշանակությունը», պատճեն, ՀԱՊ, Հուշաձեռագրային բաժին, Ֆ.144, ինվ. 39901:

19 **Ֆեթվաձեան Ա.**, «Մանուկ Հայաստան»-ի առթիւ...:

20 ԵՊՀ հայագիտության հետազոտությունների ինստիտուտ, Հայոց ցեղասպա-

թվականին, իսկ 1905-ին իր բարեկամ Հովհաննես Վարդ-Պատրիկյանի աջակցությամբ Վիեննայում տպագրեց գունավոր բացիկներ, որոնք նորությամբ էին այդ ժամանակ:

Մինչ Ֆեթվաձյանը կրթություն էր ստանում իր ժամանակի առաջադեմ կենտրոններում և շրջագայում հայրենիքում՝ Օսմանյան կայսրությունում նախապատրաստվում էր 20-րդ դարի առաջին ցեղասպանությունը: Պարբերաբար վերադառնալով Կոստանդնուպոլիս՝ նա ակա՛նատես էր լինում, թե ինչպես է ամբողջ կայսրության տարածքի հայոց դպրոցներում արգելվում հայոց պատմության, աշխարհագրության դասավանդումը. այդ առարկաներին նվիրված գրքերը բռնագրավվում էին, այրվում, իսկ ուսուցիչներին ու հեղինակներին ենթարկում պատժի՝ որպես ոճրագործների²¹: Արվեստագետն անհանգիստ հետևում էր իր հայրենիքից ստացվող լուրերին, տեսնում, թե ինչ է այնտեղ կատարվում, ինչ օրհասական վիճակում են հայտնվել իր հայրենակիցները և իրեն պարտավոր էր զգում օգնել ազգակիցներին: 1906 փետրվար և մարտ ամիսներին Օդեսայում Ֆեթվաձյանը հանդես է գալիս որպես հասարակական գործիչ, ում ելույթը և խոսքը վարակիչ եռանդ են առաջացնում իր հասակակից և ավելի երիտասարդ տեղացի մտավորականների շրջանում: Նա, Օդեսայի հայկական եկեղեցու քահանայից ստանալով բոլոր հայերի անուններն ու հասցեների ցուցակը, այցելում է նրանց, ներկայացնում իրավիճակն ու կազմակերպում է հանդերձանքի կամ կտորեղենի ձևով նվիրատվության հավաքագրումը՝ բացառելով որևէ դրամական օգնություն: Հայ շնորհալի տիկիները և օրիորդները ստացված կտորեղենից կարում են հագուստ: Արդյունքում «իրենց ձեռքերով եւ սեփական կարի մեքենաներով ձեւեցին ու կարեցին նոր կտորեղէնէ երկու հազար ձեռք հագուստ ամէն հասակի կանանց, աղջիկների եւ երեխայոց յատուկ: Սրանց վրայ պէտք է աւելացնել 200 կտորի չափ պատրաստ եւ գործածուած զգեստներ տեսակ, տեսակ մը ապա 300 զոյգ էլ կօշիկներ: Այս ամէնը տիկին Ունանեանի տանն իսկ դասաւորուեցին եւ 11 արկղներին մէջ փակուած ուղարկեցին

նության հանրագիտարան http://www.armeniansgenocide-am.armin.am/am/Encyclopedia_Of_armenian_genocide_Fetvachyan_Arshak (վերջին այցելությունը՝ 24.11.2023)

21 **Կիրակոսյան Ջ.,** *Երիտթուրքերը պատմության դատարանի առաջ*, գիրք 1-ին, Երևան, «Հայաստան» հրատ., 1982, էջ 24:

խսկոյն (ի հարկէ ապահովագրուած) Թիֆլիզի թեմի առաջնորդ Սաթու-նեան արքեպիսկոպոսի անունով առանձին խնդրագիր նամակով, որ-պէսզի անյապաղ բաշխուին աղէտեալների մէջ կարօտներին»²²:

1914–1915 թվերին Ֆեթվաձյանը ցանկանում էր «զուտ հայ ազգ. գե-ղարուեստի՝ հինի թէ՛ նորի՝ մասունքների մի թանգարան ստեղծել Էջ-միածնում, որի շուրջ հանդիպումներ էր ունեցել Կարապետ եպիսկո-պոսի հետ, իր մտերին 4–5 միաբանակիցների և մայրաքաղաքներից եկած 3–4 պատգամաւորների հետ և մեկ պատվելի Հայ Տիկնոջ հետ, ով մտադրուել էր մի 3.000 ռուբլի աջահամբույր տալ կաթողիկոսին»²³: Օրեր անց Ֆեթվաձյանը առաջարկում է Գևորգ Բաշինջաղյանին և Եղիշե Թադևոսյանին հանդիպել, քննարկել այդ նախաձեռնությունը: Յուրաքանչյուրը մշակում է թանգարանի իր նախագիծը, որոնցից ան-ցնում է Ֆեթվաձյանինը: Այն ընդհանուր հավանության արժանացավ, վավերացվեց, բայց այդպես էլ կյանքի չկոչվեց:

1914 թվին սկսվեց Առաջին համաշխարհային պատերազմը: Անխոնջ նվիրյալի հայրենիքում բնակչությունը տառապում էր սովից և համա-ճարակներից: Շուկայից, վաճառատնից և արհեստից ոչինչ չէր մնա-ցել: Խանութները և աշխատավայրերը փակվեցին: Երկիրը գտնվում էր խիստ ողորմելի վիճակում: Հաց մուրացողների թիվ ու սահման չկար²⁴: Հայ ժողովուրդը 1917 թվականը թևակոխեց ջարդված ու բզկտված, ան-թիվ ու անհամար որբերով, տեղահանաված և ռուսական հող հասած ու տարբեր վայրերում սփռված 300–350 հազար գաղթականությամբ²⁵: Հայաստանի Առաջին Հանրապետության կառավարությունը 1918 թվա-կանի ամբողջ ընթացքում երկրի ներքին և արտաքին բարդ իրադրու-թյան պայմաններում բոլոր միջոցներով ձգտում էր թեթևացնել հայ ժողովրդի համար ստեղծված ծանր վիճակը: Օսմանյան կայսրության փլուզումից հետո էլ հարյուրավոր որբեր վեց ամիս դեռ անօթևան մնա-ցին Էջմիածնի ու Վեհարանի պատերի տակ, որն անհնար էր վրձնով փոխանցել²⁶: Ֆեթվաձյանը, որպես մտածող և հասարակական գործիչ

22 **Ֆեթվաձեան Ա.**, Կ. Խաչ պատմութեան...:

23 Ազգային գեղարուեստի թանգարան, *Հորիզոն*, Թիֆլիս, 17.12.1915:

24 **Կիրակոսյան Զ.**, *Երիտթուրքերը պատմության դատարանի առաջ*, գիրք 2–րդ, Երևան, «Հայաստան» հրատ., 1983, էջ 8–9:

25 **Կիրակոսյան Զ.**, *Երիտթուրքերը պատմության դատարանի ...*, գիրք 2–րդ, էջ 881:

26 **Ֆեթվաձեան Ա.**, Ի խորոց սրտի, *Հանգ*, Երեւան, 5.1.1919:

իր հողվածներից մեկում կիսվում է իր հուշերով, նկարագրում սովա-
մահ եղող մարդկանց ու նրանց նկատմամբ վերաբերմունքն Էջմիածնի
հարակից գյուղերի ու քաղաքների բնակիչների կողմից²⁷: 1920-ի ապ-
րիլի 18-26-ը Սան-Ռեմոյի Դևաշան ապարանքում գումարվեց Անտան-
տի տերությունների գերագույն խորհրդի նիստ, որտեղ քննարկվեցին
Թուրքիայի հետ խաղաղության պայմանագրի կնքման, տարածքային
հարցեր, այդ թվում Հայաստանին վերաբերող մանրամասներ: Նախա-

27 Ահա թե ինչ է փաստում արվեստագետը. «Վեց ամսի բաց երկնքի
տակ անսաղությանից էլ ճիաղի կերպարանք ընդունած ուրականներ,
որոնք թուր էլ չունեն կոպ տալու, և որոնց՝ այժմ էլ՝ ցուրտը խոնել է մէկ մէկի
վրայ Վանքի ու Ճեմարանի յարակից զանազան անդուռ ու անպատուհան
«խանիխարաբա»ներում, ու, նոքա... մեռնում են, վերջապէս: Շատերը չունին
էլ ոչ մի մերձաւոր բացի իրենց հարևանը և նմանները, որ դուրս բերում են
մահացածների դիակները, թողնում պատի տակ, անցուղարձի, դռների առաջ,
ճանապարհի վրայ, ուր, մնում են նոքա սատկած դրութեան մէջ օրերով...
Զգիտեմ ո՞վ հնարում է լեգենդաներ, ըստ որում այստեղ Էջմիածնում թշառ
փախստականներին իբր տրում են ամեն կերպ պաշտպանութիւն և խնամք: Եւ
ահա՝ քաղաքի չափ կարեւորութիւն ստացած Աշտարակը, որ քշում է խեղճերին
դէպի Օշական, Օշականն նոյնչափ փոթեռանդութեամբ՝ Վաղարշապատ, ուր,
հարստացած, չտեսած ունևորութիւնների տէր դարձած «ազատ հայերը» հացով,
դոշաբով, գինիով և այլ Աստուծոյ բոլոր բարիքով լիացած, կուշտ ու կուռ, չեն էլ
նայում, թէ ինչպէս մերկ քաղցածները փողոցներով անցնելիս մէկ մէկ կանգ են
առնում ու թոնրից նոր դուրս բերած լաւաշի օդի մէջ ծաւալող անուշահոտութիւնը
վայելելու համար պիսչերն ու աչքերը մեծ-մեծ բացած բերանները ջրակալած դէս
ու դէն նայում ու արցունքը արնուկով սրբում...: Ամառն ի բուն և ամբողջ աշունքը
Էջմիածնի և Ճեմարանի բակերը համայնատարած բացօդեայ արտաքնոցներ
էին, և այդ գարշանքին վարժ հայ գեղջուկի աղտեղութիւնը առաւելապէս լրաց-
նում էր Ճեմարանի և յարակից շինութիւնների մէջ տեղաւորած զինուորութիւնը:
Անչնի թշառութեան մէջ շշմած, քաղցի ճանկերում գալարող մնացուկը
որբերի ու եղկելիների՝ այդ ապականութիւնով ծածկած գետինը կտցփորելով
զանազան հատիկներ, կորիզներ և էլ չգիտեմ ինչեր ասես գտնում ու հապճեպ
բերանը դնում էր հաւերի երանութեան աննկնրագրելի մի արտայայտութիւնով:
Փախստականների վերադարձի սկսելուն հետ անտէր երեխաների «վայելք»ի
այդ աղբիւրն էլ ցամաքեց. իսկ նոյեմբերի վերջին կէսից սկսած երկարատև
անձրևներից յետոյ, երբ թշառներին թխմեց Ճեմարանի շինութեան մէջ,
վերջապէս, ձիւնը եկաւ, առ ժամանակ ծածկել էին նոդկանքի հրապարակները:
Զէ, ոչ մի լեզուով չի կարելի ասել, թէ ինչպիսի սրտակտուր տեսարան է ողջ -
մեռել մերկ մանուկների համախոնումը Ճեմարանի խոհանոցի վերնայարկը
լերկ տախտակամածի վրայ, ուր նրանց հաւաքել են ձմրան ցրտին արհաւիրքից
պատսպարելու համար, ուր նրանք հինգով, տասով մահանում են ամեն օր...»
(կրճատումներով): Աղբյուրը՝ **Ֆէթվաճեան Ա.**, Ի խորոց սրտի...:

գահ Կլեմանսոն, ամփոփելով նիստը, եզրակացրեց. «Ֆրանսիան ոչինչ չի կարող անել, ներկայումս Ամերիկան ևս ոչինչ չի կարող անել: Մնում է տեսնել որպես արդյունք այս ամենի, արդյոք հայերը կմնան»²⁸:

Եվ այո, մնացին:

Ֆեթվաձյանը շարունակում էր ցուցահանդեսներ կազմակերպել Եվրոպայում՝ ներկայացնելով իր գեղանկարչությունը, որ ստեղծել էր Հայկական Լեռնաշխարհում տարիներ շարունակ իր ղեգերումների ընթացքում: Այսպես, 1919 թվին, Փարիզում տեղի ունեցավ Ֆեթվաձյանի մի քանի ցուցահանդես, որոնցից մեկը Հայաստանի Հանրապետության պատվիրակության դահլիճներում: Ցուցահանդեսներում ներկայացված էին հայ կանանց կերպարների՝ զարդերով, մեղմ զույներով, տարազներով, մետաքսյա, արծաթաթել, ոսկեթել ասեղնագործությամբ, ինչպես նաև Հայաստանի VI – XIII դդ. քրիստոնեական կոթողների՝ հայ ճարտարապետությանը վերաբերող հուշարձանների ու ավերակների բեկորների և նախշազարդերի յուղաներկով, ջրաներկով, կավձամատիտով, ածուխով, մատիտով և թանաքով²⁹ կատարված շուրջ 200 աշխատանքներ: Հաջորդ ցուցահանդեսի կատալոգի առաջաբանը հեղինակեց մեծանուն բյուզանդագետ, քրիստոնեական գեղարվեստի գիտությունների հայտնի բանասեր, ակադեմիկոս Շարլ Դիլը: Այդ ցուցահանդեսների մասին ֆրանսիական մամուլը հիացմունքով է արտահայտվել՝ նշելով, որ ցուցահանդեսը հատկապես արժեքավոր ու գնահատելի է «հայրենիքի համար այդ տխուր ու սև օրերին»³⁰, քանի որ գրավել էր համաշխարհային արվեստի քննադատների ուշադրությունը ու շատ բարձր գնահատվել նրանց կողմից: 1920 թվականի ապրիլի 5-ին Լուվրի Մառսոնի առանձին ցուցասրահում բացվեց ևս մի ցուցահանդեսը: Փարիզում այդ տեսակ պատվի դեռ ոչ մի հայ նկարիչ չէր արժանացել: Հետայսու մնացած բոլոր ցուցահանդեսներին Ֆեթվաձյանի միակ ցանկությունն էր հրատարակված տեսնել իր ներկայացրած աշխատանքները, որպեսզի այն համայն քաղաքակիրթ աշխարհի սեփականությունը լինի: Ֆեթվաձյանի արվեստը բարձր է

28 Կիրակոսյան Ջ, *Երիտթուրքերը պատմության դատաստանի...*, գիրք 2-րդ, էջ 277:

29 Exposition Fétvadjian, *Bulletin arménienne*, Paris, 15.10.1919.

30 Տէր-Գրիգորեան Ռ., Ա. Ֆեթվաձեանի ցուցահանդէսը Պարիզում, *Նոր աշխատանք*, Թիֆլիս, 23.06.1920:

գնահատել նաև ֆրանսահայ խոշոր արվեստագետ Ռաֆայել Շիշմանյանը, նշելով, որ Ֆեթվաձյանը «Զրանկարիչներու Միջազգային Միութեան» միակ հայ անդամն է, միակ հայ բացառիկ ջրանկարիչը, որն ամենաներկարակյացն է այս մասնագիտության մեջ³¹։ Հիշեցնենք, որ Ֆեթվաձյանի ջրանկարչական աշխատանքներից է նաև Հայկական լեռնաշխարհի տարբեր նահանգներին բնորոշ հայ կնոջ տարազների գունավոր բացիկների շարքը, որոնք մեծ ժողովրդականություն էին վայելում դրանց լույս ընծայումից սկսած։ Փարիզից հետո, նույն ցուցահանդեսով նա հանդես եկավ Մեծ Բրիտանիայում՝ Լոնդոնում և Բենսինգթոնում, Վիկտորիա և Ալբերտ թանգարանում, վեց ամիս շարունակ՝ 1921 թվականի նոյեմբերի 8-ից մինչև 1922 թվականի հունվարի 15-ը։

Ֆեթվաձյանի շնորհիվ Հայաստանի առաջին Հանրապետությունն ունեցավ իր նամակադրոշմներն ու թղթադրամները, որոնց տպագրությունը սկզբում փորձեցին կազմակերպել Երևանի և Էջմիածնի տպարաններում, այնուհետև Թիֆլիսում, բայց անարդյունք։ Ի վերջո 1920 թվականին գործը վստահվեց Փարիզի Հայաստանի պատվիրակությանը, որը բոլոր ջանքերը գործադրեց այն հաջողելու համար։ «Փարիզի Հայաստանի պատվիրակությունը քանի մը անյաջող դիմումներ է ետք հայ արուեստագետներու մօտ դրոշմներու գծագրութեան կամ նկարման գործը յանձնուած է յայտնի եւ բազմապատակ նկարիչ Ա. Ֆեթվաձեանի, որ երկու շաբաթէն նկարած է զանոնք, ի մեծ զարմանս Պատուիրակութեան»³²։ Հայաստանի պատվիրակության նախագահ Ավետիս Ահարոնյանի ստորագրությամբ և մակագրությամբ հայկական դրոշմները հանձնվեցին տպագրության³³։ Ընդհանուր առմամբ 10 անվանական արժեքով թղթադրամներ³⁴ էին և տպագրվեցին ընդամենը 1.200.000 կամ 1.300.000 օրինակով³⁵՝ մեծ ու փոքր Մասիսների նկարով և ջուլիակագործ կնոջ պատկերով։

31 **Շիշմանեան Ռ.**, Զրանկարիչներու միջազգ. ընկերութեան ցուցահանդէսը, *Վերածնունդ*, Փարիզ, 30.10.1920:

32 **Վերաձին Ա.**, Հայաստանի նամակադրոշմներն եւ Ա. Ֆեթվաձեան, *Հայ Վաստակ*, Պոսթոն, 08, 05.1932:

33 Նույն տեղում:

34 1 թուրլի, 3, 5, 10, 15, 25, 40, 50, 70 և 100 թուրլի անվանակարգով: Տես **Վերաձին Ա.**, Հայաստանի նամակադրոշմներն...:

35 **Վերաձին Ա.**, Հայաստանի նամակադրոշմներն...:

Առաջին Հանրապետության հաստատումից հետո Ֆեթվաձյանը, որով երկար տարիներ ապրել էր հայրենիքից հեռու, որպես մտավորական, որպես հայրենասեր, որպես հասարակական գործիչ՝ մեծ հույսեր էր կապում օտար ավերից հայրենակիցների՝ հայրենիք վերադառնալու գործընթացի հետ: Նա համոզված էր, որ «գաղութներում իւր գոյնն ու նկարագիրը, իւր ազգագրական բնորոշութիւնները, իւր դիմագծի ուրույն գրաւութիւնը կորցնող հայերը նորէն հայացնելու գործում, նոր դաշնակցութիւնը պիտի ջանայ՝ իրեն տրամադրած ամեն միջոցներով ձամբի բերել մոլորածներին: [...] Հայեր, հայ յեղափոխութիւնը չի վերջացաւ. Հարկաւոր է մի նոր դաշնակցութիւն, մի փրկութեան բանակ գաղութներում հալող կորչող, հայ ցեղի անունի վարկը ստորացնող հայութիւնը նորից հայացնելու համար»³⁶:

«Այս անախորժ, տխուր ու անհրապոյր անկիւնը»

Ֆեթվաձյանը Միացյալ Նահանգներ՝ Նյու Յորք, եկավ 1922 թվականի օգոստոսին և մտադիր էր մնալ երեք ամիս³⁷: Հոկտեմբերին արվեստագետ – գիտնականը հանդես եկավ երկշաբաթյա ցուցահանդեսով Կոլումբիայի համալսարանի «Avery» ձարտարապետության գրադարանի ընդարձակ սրահում, իսկ 1923 թվին «Renaissance Society» հրավերով և հովանավորությամբ Չիկագոյի համալսարանում, որտեղ նվիրյալ մտավորական – արվեստագետի աշխատանքները «ամէնէն անարուեստ հոգիին իսկ աչքերը կը բանան»³⁸, այնուհետ «College Art Society», մասնավոր հրավերով Փրինսթոնի համալսարանում³⁹: Եվրոպայում կայացած ցուցահանդեսները մեծ արձագանք են գտնում նաև Միացյալ Նահանգների հայալեզու մամուլում: Ֆեթվաձյանին անվանում էին «մեկ այլ մեծ քաղաքակրթության Պավսանիաս, ով միավորել է իրերի անզուգական հավաքածուն, ջրաներկով կամ մատիտով արձանագրում է իր հայրենի երկրի հիասքանչ ձարտարապետությունը,

36 **Ֆեթվաձեան Ա.**, Մենք մեզ պիտի օգնենք. Հայ յեղափոխութիւնը չի վերջացաւ. Գ., *Յուսաբեր*, Գահիրէ, 5.08.1920:

37 Arshag Fetvadjian to Visit America, *The Christian Science Monitor*, USA, 3.08.1922.

38 Հայ տաղանդը եւ գեղարուեստը Շիքակոյի համալսարանին մէջ, *Հայաստանի կոչնակ*, Նիւ Եորք, 29.09.1923:

39 Ֆեթվաձեանի Կենտրոնական Յոբեյանական հանձնախումբը Նյու Յորքում գրեց Ֆեթվաձեանի գործի կարևորությունն ու նշանակությունը, պատճեն, ՀԱՊ, Հուշաձեռագրային բաժին, Ֆ.144, ինվ. 39901:

ոչ միայն մեծ վարպետությամբ և նրբանկատությամբ, այլև լիովին, ամբողջական մեկնությամբ»⁴⁰:

Ֆեթվաձյանի կյանքի ամերիկյան շրջանը (25 տարի) գլխավորապես նվիրված էր նախորդ տասնամյակների նրա գիտական և արվեստագիտական, հայանպաստ գործունեության բեղուն աշխատանքները ամերիկահայ գաղութին և օտարերկրացիներին ներկայացնելուն:

Իր ազգի պես «ընդ հուր եւ ընդ ջուր»⁴¹ անցած մտավորականը հրաշալի գիտակցում էր իր կատարած աշխատանքի համաշխարհային արժեքը և Միացյալ Նահանգներում իր գիտական հետազոտություններով հանդես էր գալիս դասախոսություններով՝ անգլերեն, ֆրանսերեն, Հարվարդի, Փրինսթոնի, Կոլումբիայի համալսարաններում սև-սպիտակ և գունավոր լուսապատկերների ուղեկցությամբ: Հարվարդի համալսարանի «Fogg» արվեստի թանգարանի տնօրինության հրավերով մեծավաստակ Ֆեթվաձյանի դասախոսության ունկնդիր ուսանողները նկարների ցուցադրության ընթացքում փորձում էին ընդօրինակել իրենց ձեռքի տետրերում վարպետի աշխատանքների գծերն ու գեղեցկությունները: «Որքան օտարներու, նոյնքան և մեր մտքին, ամեն ինչ որ հայկական է միշտ ալ զուգորդուած է՝ մռայլին ու տխուրին հետ: Պ. Ֆեթվաձեան իր խօսքով ու նկարներով պիտի ապացուցանէ, թէ որքան սխալ է այդ կարծիքը կամ տպաւորութիւնը: [...] Ֆեթվաձեան իր խօսքով ու նկարներով՝ հայ հոգիի այդ մաքրամաքուր լոյսն է որ պիտի բերէ մեր լուսակարօտ հոգիներուն»⁴²: Բանասէր-նկարչի⁴³ դասախոսությունները հանրամատչելի չէին, պահանջում էին հիմնարար գիտելիքներ «իրենց հայրութիւնովը հպարտ հայերից»։ դասախոսության ավարտին ներկաները խոստովանում էին, որ «հիմա աւելի լաւ հայ եղանք»⁴⁴:

Ամերիկահայ մամուլը ամեն կերպ քաջալերում էր ներկա լինել Ֆեթվաձյանի դասախոսություններին, ցուցահանդեսներին, քանի որ դրա շնորհիվ ներկաները գիտակցում էին, «որ նա գալիս է մեծ ռազմիկնե-

40 Armenian Architecture, *Glasgow Herald*, Glasgow, 10.11.1921.

41 **Պետիկեան Ա. Ա.**, Ֆեթվաձեանի «Նուիրաբերութիւնը», *Պայքար*, Պոսթոն, 27.06.1947:

42 Պ-ն Ա. Ֆեթվաձեանի դասախօսութիւնը, *Հայրենիք*, Պոսթոն, 18.12.1924:

43 Շնորհաւորելի աշխատասիրութիւն մը. մագաղաթի վրայ հայ ձեռագիր գիրքերու գեղարուեստը, *Հայրենիք*, Պոսթոն, 10.1927:

44 Ամերիկահայ կեանք, մի փախցնէք առիթը, Ֆիլատելֆիայի հայերու ուշատրութեան, *Հայրենիք*, Պոսթոն, 08.10.1934:

րի ռասայից, մեծ ճարտարապետությամբ, գիտությամբ և հնարամտությամբ⁴⁵, իսկ Ֆեթվաձյանն ամենադժվար ժամանակներում «ինքնավատահոլության եւ առնական ինքնամոփոխումի ուժ մը կը ներշնչէ մեզի»⁴⁶:

Արշակ Ֆեթվաձյանի 2000 հասնող մատիտանկարները մի քանի անգամ փորձել են հրատարակել, բայց նույնիսկ ձևավորված անվանական հանձնաժողովին դա չհաջողվեց, ոչ էլ գտնվեցին առանձին բարերարներ այդ հայանվեր, անձնուրաց աշխատանքը ներկայացնելու: «Մինչեւ հիմա Փարիզի, Լոնտոնի, Նիւ Եորքի եւ Շիքակոյի մէջ եղած ցուցահանդէսներուն վրայ Փրինսթընի համագումարը կ'աւելնայ ապացուցանելու թէ ինչպիսի անհրաժեշտութիւն է Ֆեթվաձեանի գործերուն հրատարակութիւնը, ու հաւաստիք մը թէ այն արդարեւ պիտի ըլլայ արժէքաւոր նպաստ մը քաղաքակրթութեան եւ գեղարուեստի պատմութեան մէջ»⁴⁷: Առանձին ուշադրության էր արժանանում ամերիկահայ գաղթօջախի կողմից Ֆեթվաձյանի «Մանուկ Հայաստան» աշխատանքը, որը, ըստ ամերիկահայ պարբերականներից մեկի, «շատերու է ներշնչեր կորով եւ խրախոյս»⁴⁸, հայ ցեղի արժանաւոր զաւակ մը, վրձնի հոյակապ վարպետ իր «Մանուկ Հայաստան» անունով մեծադիր նկարի ցուցադրութիւնը նպատակ ունի հայ ազատագրութեան նուիրական խորհուրդէն փշրանք մը տալ ամէն հայ տունի եւ ամէն հայ հոգիի, որովհետս գաղութներու մէջ մանաւանդ մենք առհասարակ զրկուած ենք այսպիսի ազգային ներշնչումներէ, եւ առաւելապէս պէտք ունինք այդ կարգի նկարներու: Տեղը ապրեցնելու համար հացը եւ ջուրը միակ էականը չեն, անոր հոգին՝ այդ անմահ հոգիին երգիչները կենսական արժէք ունին: Նկարիչ Ֆեթվաձեանի Մանուկ Հայաստանը ամեն հայու տուն եւ անհատ պարտաւոր է ունենալ»⁴⁹: Արվեստագետը նախաձեռնեց իր ստեղծագործության տպագիր տարբերակը 2 դոլարով վաճառել: Ահա թե ինչպես էր մեկնաբանում Ֆեթվաձյանը իր նախաձեռնությունը. «որպէս հայ արուեստագէտ՝ վաղուց է որ սրտի

45 Fetvajian gives colorful lecture to A.R.F. students, *Hairenik Weekly*, Boston Mass., 20.12.1935:

46 Հայկական ճարտարապետութիւնը եւ Պ.Ա. Ֆեթվաձեանի գործերը, *Հայրենիք*, Պոսթոն, 01.01.1925:

47 Քալանթար Նալբանդեան Վ., Ֆեթվաձեան ամերիկացիներու մէջ, *Հայաստանի կոչնակ*, Նիւ Եորք, 12.01.1924:

48 Վաղարշ Վ., «Մանուկ Հայաստան», *Հայաստանի կոչնակ*, Նիւ Եորք, 30.06.1923:

49 Նկարիչը եւ «Մանուկ Հայաստան», *Նոր օր*, Ֆրեզնո, Ալտադենա, 03.07.1923:

ցաով կը տեսնէի՝ ամէն տեղ՝ հայ տունը գուրկ մեր իսկական հայացի նկարի զարդարանքներէն: Ես ալ չունենալով սովորութիւն կրկնել միեւնոյն նկարը, առ հասարակ շատ քիչներին մատչել եմ եղել եւ մեր ազգային լայն խաւերը չեմ կրցած հաղորդակից ընել իմ ապրումներու եւ զիս ոգետորոզ մտքերու: Օգտուելով տպագրական արուեստի ընծայած դիրքութիւններէն ահա տուի իմ հայ ապրումների մէկ նկարը»⁵⁰: Այս ստեղծագործությունը ներկայացնում է հայ կնոջ, հայուհու հավաքական կերպար՝ ինքնապաշտպանության բնագոյի, անվախության, դիմադրության, հաստատականության, մայրական գորովի, անվախության, դիմադրության, քաջության, առույգության, հաղթանդամության խորհրդանիշ⁵¹:

1932 թվականին «20th century club» ցուցասրահում ձարտար և հմուտ նկարիչը ներկայացրեց 37 աշխատանք, որը, ինչպես նկատեց ամերիկահայ մամուլը, «միայն մէկ փոքրիկ մասն է այն նկարներուն, զոր տարիներէ ի վեր անընդհատ կը գծէ Ֆէթվաճեանը՝ կաթիլ առ կաթիլ իր աչքերուն լոյսը եւ մտքին ու հոգիին բոլոր շնորհները քամելով անոնց վրայ»⁵²:

1923 թվականին Նյու Յորքում կազմվեց «Ֆէթվաճյանի հորեյլանական կենտրոնական հանձնախումբ»՝ տոնելու հայ գեղարվեստի սյուններից մեկը⁵³ համարվող արվեստագետի քառասնամյա հորեյլանը, ով «20 ամբողջ տարիներ բացարձակ անձնուրացութեամբ իր տաղանդն ու արուեստը գործածած է մեր ազգի նուիրական հնութիւններն ու կանգուն յիշատակարանները նկարելու ու ատով յաւերժացնելու անոնց պատմական կեանքն ու նշանակութիւնը»⁵⁴: Այդ հանձնախումբը բաղկացած էր ամերիկահայ գաղութի բոլոր խավերի ներկայացուցիչ-

50 Նկարիչ Ֆէթվաճեանի «Մանուկ Հայաստանը», *Պայքար*, Պոսթոն, 06.15. 1923:

51 **Վաղարշ Վ.**, «Մանուկ Հայաստան», Գեղարուեստական քրոնիկ, *Հայաստանի կոչնակ*, Նիւ Եորք, 30.06.1923:

52 **Վրոյր Ս.**, Արշակ Ֆէթվաճեան (իր նկարահանողէսին առթիւ), *Հայրենիք*, Պոսթոն, 1932:

53 **Վրոյր Ս.**, Արշակ Ֆէթվաճեան..., Արշակ Ֆէթվաճեան, Հայ Մամուլի արտայայտութիւնները Արշակ Ֆէթվաճեանի մահուան առթիւ, «Ասպարէզ» թերթի խմբագրականը, ստորագրուած պրն. Ասատուր Խտրեանէ (ըստ՝ **Տէր-Մանուէլեան Ա.**, *Նկարիչ Արշակ Ֆետվաճեան, Արշակ Ֆէթվաճեանի կենսագրութիւնը*, Պէյրութ, Տպարան Սեւան, 1966, էջ 118):

54 Նկարիչ Ֆէթվաճեանի յօբելեանը, *Հայրենիք*, Պոսթոն, 11.10.1923:

ներից, որը պետք է ձևավորեր հիմնադրամ՝ հրատարակելու Ֆեթվա-
ձյանի գործերը հայկական արվեստի և հատկապես ճարտարապե-
տության մասին՝ մեր ժողովրդին և օտարներին ծանոթացնելու մեր
զանձերի հետ ու հաջորդ սերունդներին փոխանցելու այն⁵⁵։ Այդպիսով,
հանգանակությունը պիտի ունենար համազգային եւ ժողովրդական
բնույթ, իսկ կազմակերպված զանազան մեծ կենտրոններում ցուցադ-
րությունները նույն նպատակին պետք է ծառայեին⁵⁶։ 1931 թվականի
վերջին Ա. Ֆեթվաձյանի որոշմամբ հորեյանական հանձնախումբը
դադարում է գոյություն ունենալ⁵⁷։

Ամերիկայում սկզբնական շրջանում նա բնակություն է հաստա-
տում Բոսթոնի Դուայթ փողոցի 20 հասցեում սառը, տխուր խուց հիշեց-
նող սենյակում, ուր արևը հազիվ էր ներս մտնում միակ պատուհանից.
աշխուժորեն, տարիքի համեմատ զարմանալի եռանդով, գրասեղանի
առջև աշխատում էր արվեստագետ-գիտնականը։ Ամենուր թղթեր, ձե-
ռագրեր, ճամպրուկներում՝ նկարազարդումներով հարուստ աշխա-
տություններ՝ հայ և համաշխարհային մշակույթի վերաբերյալ։ Այս խու-
ցը հայ արվեստագետի և աշխատասենյակն էր, և ննջարանը, և խոհա-

55 Նույն տեղում։

56 Նույն տեղում։

57 Նյու Յորքում մի խումբ ազգայիններ, մեծապես խանդավառուելով իր գոր-
ծին ունեցած գեղարուեստական բարձր արժեքն ու ազգային եւ պատմա-
կան նշանակութենէն, ուզեցին յարգել Յոբելեարը զոյացնելով 25.000
\$-ի ֆընտ մը իր գործերուն հրատարակութեան համար։ Այս հանձնախումբը
մինչև 1925 վերջերը հարատւ ջանքեր արեց առաջադրված նպատակը իրա-
կանացնելու համար և ունեցավ հետևյալ արդյունքը։ Հրատարակուեց գրք-
քույկ, որը խնամքով պատրաստուած նախաբան մըն էր պ. Արշակ Ֆեթվա-
ձեանի եւ իր գործը ներկայացնելու ժողովուրդին։ Գրքույկից տպվեց 2500 օրի-
նակ։ Երկու նկարահանողն Չիկագո և Փրինսթոն, հեղինակի լավագույն գոր-
ծերը, որոնք ամերիկյան գեղարուեստական դժուարահաճ շրջանակնե-
րու բարձր գնահատութեան արժանացան։ Պատրաստվեցին Ֆեթվաձեանի
գեղեցկագոյն նկարների 12 սլայտ ապակեա, դասախոսության համար ու գու-
նավոր նկարների կադապարներ։ Կենտրոնական հանձնախումբը փորձել է
յանձնախմբեր կազմել Սիացեալ Նահանգների բոլոր մեծ ու հայաշատ կենտ-
րոններում, ու գրավոր անձնական դիմումներ է ուղակել այդ կենտրոնների
աչքառու անձնավորություններին։ Գրվել են նաև 100-ից ավելի հայերեն ու 50-
ից ավելի անգլերեն նամակներ, դիմելով մասնաւոր անհատներին նվիրատ-
վութեան համար։ Տեն Հայրենիք, 13.12.1931, Պոսթըն (նամակ խմբագրութեան
1923-ի ապրիլի 30-ին)։

նոցը: Անբնական պայմանները նրան ստիպել էին դառնալ մռայլ, հոռետես, անտրամադիր, անվերջ գանգատներով, թթված ու դառնացած դեմքով մի մարդ, բայց իրեն համար անծանոթ բաներ էին չարությունն ու դիսկալությունը⁵⁸: Ինչպես հայրենիքում, այնպես էլ տարագրության մեջ՝ Միացյալ Նահանգներում, նա մնաց «Խառնուածքով՝ կատարեալ արուեստագէտ մըն էր ան: Սիրահար լաւ ուտելիքներու, լաւ հագուելու: Միշտ մաքուր ու կոկիկ կը հագուէր՝ հակառակ իր ունեցած նիւթական համեստ ու սահմանափակ պայմաններին: Իր միտքն ու ձեռքերը անվերջօրէն ստեղծագործելով էին զբաղած ու տակաւին միշտ կը մտածէին աւելիին մասին»⁵⁹: Խորաթափանց միտք, սուր տեսողութիւն եւ մանաւանդ ձարտար մատներ⁶⁰: Ծայր աստիճան զուսպ էր եւ շատ սակաւախօս ու ժուժկալ՝ մարդոց մասին արտայայտուելու եւ իր կարծիքը հաղորդելու ժամանակ: Եզակի անձնաւորութիւն մըն էր իր հարուստ մտապաշարով, նկարելու բարձր արուեստով, կոկիկ հագուածքով ու նուրբ կենցաղավարութեամբ»⁶¹:

Նրան հատկապես տխրեցնում էր, և նա չափազանց սուր էր զգում Միացյալ Նահանգներում առկա սոցիալական անարդարությունը, երբ համեմատում էր իր վաստակը մյուսների վաստակի հետ: Տեսնում էր, թե ուրիշները ինչպես են աշխատում, կյանքը վայելում, իսկ ինքը՝ վրստահ իր կարողության և ունեցած արժանիքների վրա, «կարծէք միշտ կը հալածուէի բախտէն՝ ամէն տեղ: Ինձմէ պակաս շնորհ ունեցողներ ամէն օր հաւ կ'ոտէին, մետաքս շապիկ կը հագնէին եւ ծանրաբժէք սիկառներ կը ծխէին, իսկ ինծի վիճակուած էր անգործութիւնը միայն, բախտին լքուած՝ անորոշ ձակատագիր մը, եւ կեանքս այսպէս քարշ կու տայի Լեքսինկթըն պողոտայի վրայ գտնուող պանդոկի մը մութ ու նեղ խցիկին մէջ, փռշիներով ու մուրով ծածկուած: Ես, որ երիտասարդութեանս ամենէն գեղեցիկ տարիները նուիրաբերեր եմ հայ հանձարին պատմական ստեղծագործութիւնները նկարելու եւ երեւան քերեր եմ կոթողական գործ մը, որուն մասին ինձմէ առաջ ոչ ոք է մտածած»⁶²:

58 **Տէր-Սանուկեան Ա.**, *Նկարիչ Արշակ Ֆետվաճյան, Արշակ Ֆէթվաճեանի կենսագրութիւնը...*, էջ 20–23:

59 Նույն տեղում, էջ 19:

60 Նույն տեղում, էջ 120:

61 Նույն տեղում, էջ 79:

62 Նույն տեղում, էջ 25:

Այդ շրջանում ամերիկաբնակ տեր և տիկին Մանվելյանների հրավերով Ֆեթվաձյանը Նյու Յորքից փոխադրվում է Բոստոն, որը բարենպաստ է ազդում նրա հոգեվիճակի վրա: Նրան մեծահոգաբար էին հյուրընկալել՝ ստերմիկ գրույցներով համեմված, այլ հյուրերի հետ միասին Արևելքի հատուկ հյուրասիրությանը պատրաստված ձոխ սեղանների շուրջ⁶³: Մի անկեղծ գրույցի ժամանակ Մանվել Մանվելյանը խորհուրդ է տալիս Ֆեթվաձյանին մոռանալ Հարվարդի կամ Վենետիկի մասին, հույս չդնել նրանց վրա գործերը հրատարակելու համար, որը արվեստագետ-հետազոտողի համար երազ ու իդեալ էր. փոխարենը ամբողջը նվիրաբերել Հայաստանի պետական թանգարանին⁶⁴: «Հայրենիքն է անոնց տեղը, Հայաստանի պետական թանգարանը, ուր պիտի ունենան իրենց պատուոյ տեղերը»⁶⁵: Մանվելյանը ձեռնարկեց Ֆեթվաձյանի հայրենադարձության գործընթացը, բայց այդ օրերին հայրենիք կարող էին վերադառնալ միայն պաշտոնական պատճառներ և/ կամ կաթողիկոսական ընտրության հրավեր ունեցողները⁶⁶:

Կյանքի վերջին տարիները «հնազէտ-արթիստը»⁶⁷, «հայ ցեղի արժանաւոր զաւակ մը, վրձնի հոյակապ վարպետը»⁶⁸ մշտապես Մանվելյան ընտանիքի հոգածության և ուշադրության կենտրոնում էր: Վատառողջ լինելու պատճառով Ֆեթվաձյանը չէր ցանկանում նրանց անհանգստություն պատճառել և տեղափոխվում է Մէտֆրդտ Չէսթ Հոմ՝ արևոտ սենյակ, ընդարձակ, լուսավոր, խոշոր պատուհաններ, մշտական ջրով ու տաքությանը, ամեն տեսակ հարմարություններով⁶⁹: Նույնիսկ հիվանդ վիճակում Ֆեթվաձյանը սթափ գիտակցության և տրամաբանության տեր էր⁷⁰: Նա մահացավ 1947 թվականի հոկտեմբերի 7-ի առավոտյան: Ութերթաւուն քաղաքի Սուրբ Հակոբ եկեղեցու թաղման արարողությունից հետո բանկից հանեցին Ֆեթվաձյանի բոլոր նկարներն ու ազգագրական գործերը և փայտե ձամպրուկների

63 Նույն տեղում, էջ 32:

64 Նույն տեղում, էջ 34:

65 Նույն տեղում, էջ 35:

66 Նույն տեղում, էջ 44:

67 **Դիմաքանեան Ե.**, Հայ արուեստագէտ մը Ամերիկայի մէջ, *Հայրենիք*, Պոսթոն, 10.10.1925:

68 Նկարիչը եւ «Մանուկ Հայաստան»...

69 **Տէր- Մանուէլեան Ա.**, *Արշակ Ֆէթվաձեանի կենսագրութիւնը...*, էջ 94-95:

70 Նույն տեղում, էջ 90:

մեջ դրված աճյունի հետ միասին փոխադրեցին Հայաստան: «Ոսկի սրտով, ճշմարիտ հայրենասերի բաբախուն հոգիով, արուեստագետ և վաստակաւոր հայ մըն ալ կ'իջնէ գերեզման, 84 տարիներու բեռը ուսերուն, այլ իր կոչումը լրիւ իրագործած, իր տուրքը իր ժողովուրդին լրիւ հատուցած, արուեստի ու բանասիրութեան լրիւ ծառայած հայ մը»⁷¹: Նա թաղվեց «հայ արուեստի պանթեոնում, նկարիչներու թաղին մէջ, նկարիչ Աղաջանեանի քովը»⁷²: Խորհրդային Հայաստանում հետմահու առաջին ցուցահանդեսը կայացավ Հայաստանի պետական պատկերասրահում 1956 թվականի օգոստոսի 26-ին:

Նա կարող էր լինել Խորհրդային Հայաստան վերադարձող հայրենադարձների առաջին նավերից մեկում, սակայն 25 տարի շարունակեց ծառայել հայրենիքին օվկիանոսից այն կողմ՝ Միացյալ Նահանգների լավագույն համալսարաններում ներկայացնելով տասնամյակների իր անձնուրաց գիտական, հետազոտական աշխատանքը:

ՀԱՊ հուշաձեռագրային բաժնի արխիվավար, տողերիս հեղինակը, արժևորելով Ֆեթվաձյանի գրավոր գիտական ժառանգությունը, անտիպ հայալեզու աշխատությունները, ցանկանալով իր մասնակի ներդրումն ունենալ նրա ժառանգության հասանելիության, մատչելիության ապահովման գործում, ստեղծել է համակարգչային շարվածք՝ առաջին հատորում մեկտեղելով հայ և համաշխարհային մշակույթի մասին, իսկ երկրորդում՝ հողվածները, ելույթները, խոհերը, բանաստեղծությունները⁷³: Երկհատորյակի հրատարակումը նպատակահարմար ենք տեսնում առցանց հարթակում՝ հնարավորինս շատերին հնարավորություն տալով ծանոթանալու աշխատանքին: Նմանօրինակ կարելի է ներկայացնել Ֆեթվաձյանի ձեռագիր, հայալեզու, տեղ-տեղ օտարալեզու հատվածներով մեջբերվող համաշխարհային արվեստի յոթհատորյակը բաղկացած և «Հայ գրքի գեղարվեստը» երկհատորյա ձեռագիր աշխատությունները, որոնք կնպաստեն Արշակ Ֆեթվաձյանի դեռևս անհայտ գիտական գործունեության հանրայնացմանը:

71 Հայ Մամուլի արտայայտությունները Արշակ Ֆեթվաձեանի մահուան առթիւ (ըստ՝ **Տէր-Մանուէլեան Ա., Արշակ Ֆեթվաձեանի կենսագրութիւնը...**, էջ 119):

72 Նկարիչ-բանասէր Արշակ Ֆեթվաձեանի աճիւնները փառքով ու պատուով կը տարուին հայ արուեստի պանթեոնը, «Լրաբեր» թերթէն (ըստ՝ **Տէր-Մանուէլեան Ա., Արշակ Ֆեթվաձեանի կենսագրութիւնը...**, էջ 122):

73 Բանաստեղծությունների համակարգչային շարվածքը՝ ՀԱՊ գծանկարի ֆոնդի ֆոնդապահ, արվեստաբան Գոհար Չեմենյանի (Հ.Դ.):

UNPUBLISHED PAGES FROM ARSHAK FETVADJIAN'S ARCHIVE

HRIPSIME DAYAN

State Academy of Fine Arts of Armenia

National Gallery of Armenia

Abstract

This article presents, for the first time, archival materials relating to Arshak Fetvadjian's life and activity. Some of them are unique, previously unpublished ones newly representing him as a scholar, thinker, public figure and researcher of Armenian culture. The “fruits” of his travels in the Armenian Highland are about 2,000 paintings depicting Armenian monuments, both standing and ruined, as well as Armenian women and jewellery. In the first half of the 20th century, these works were presented at the best exhibitions in Europe and the USA. An eyewitness to the events that took place during and after the Genocide, Arshak Fetvadjian published a number of articles expressing his attitude towards those tragic pages of Armenian history. He also organized humanitarian aid to support Armenian orphans and the survivors of the Genocide. The article also enlarges on the American period of Fetvadjian's creative activities, revealing him as a thinker and scholar, and also describing his endeavours to return to his homeland. We have also studied memoirs and articles about this scholar and the artist published in the United States, highlighting opinions about him and assessment of his works.

Keywords: Arshag Fetvadjian, Armenian Genocide 1915, Arshag Fetvadjian in the United States of America, Armenian Highland, architectural monuments in Armenian art, the figure of ‘Infant Armenia’

НЕИЗДАНЫЕ СТРАНИЦЫ ИЗ АРХИВА АРШАКА ФЕТВАЧЯНА

РИПСИМЕ ДАЯН

Государственная академии художеств Армении

Национальная галерея Армении

Резюме

В данной статье впервые представлены архивные материалы, связанные с жизнью и творчеством Аршака Фетвачяна, в том числе уникальные, по-новому раскрывающие его как ученого, мыслителя, общественного деятеля и исследователя армянской культуры. Результатом его странствий по Армянскому Нагорью явилось около 2000 различных архитектурных памятников Армении, найденных как в сохранившихся, так и в руинах, фигур и украшений армянских женщин, которые были представлены на лучших выставках Европы и США в первой половине XX века. Аршак Фетвачян был очевидцем событий, развернувшихся во время и после Геноцида, свое отношение к которым он выразил не только в своих статьях, но и организовал гуманитарную помощь в поддержку сирот и беженцев, переживших Геноцид. Представлены творческие достижения Фетвачяна в американский период как мыслителя, ученого, его стремление и попытки вернуться на родину. В статье также приведены оценки и квалификации Фетвачяна, выделенные из опубликованных в США статей и воспоминаний об ученом-художнике.

Ключевые слова: Аршак Фетвачян, Геноцид Армян 1915 года, Аршак Фетвачян в Соединенных Штатах Америки, Армянское Нагорье, Архитектурные памятники в армянском изобразительном искусстве, образ «Младенца Армении»

Գրականության ցանկ

1. ՀԱՊ, Հուշաձեռագրային բաժին, Ֆ.144, ինվ. 39901:
2. Ազգային գեղարուեստի թանգարան, *Հորիզոն*, Թիֆլիս, 17.12.1915:
3. Ամերիկահայ կեանք, մի՛ փախցնէք առիթը, Ֆիլատելֆիայի հայերու ուշատրուբեան, *Հայրենիք*, Պոսթոն, 08.10.1934:
4. **Դիմաքայան Ե.**, Հայ արուեստագէտ մը Ամերիկայի մէջ, *Հայրենիք*, Պոսթոն, 10.10.1925:
5. ԵՊՀ Հայագիտության հետազոտությունների ինստիտուտ, Հայոց ցեղասպանության հանրագիտարան http://www.armeniansgenocide-am.armin.am/am/Encyclopedia_Of_armenian_genocide_Fetvachyan_Arshak (վերջին այցելությունը՝ 24.11.2023)
6. **Կիրակոսյան Զ.**, *Երիտթուրքերը պարսկության դարարանի առաջ*, գիրք 1-ին և 2-րդ, Երևան, «Հայաստան», 1982-1983:
7. Հայ տաղանդը եւ գեղարուեստը Շիքակոյի համալսարանին մէջ, *Հայաստանի կոչնակ*, Նիւ Եօրք, 29.09.1923:
8. Հայկական ճարտարապետութիւնը եւ Պ-ն Ա. Ֆէթվաճեանի գործերը, *Հայրենիք*, Պոսթոն, 01.01.1925:
9. **Տէր-Մանուէլեան Ա.**, *Նկարիչ Արշակ Ֆեթվաճեան. Արշակ Ֆեթվաճեանի կենսագրութիւնը*, Պէյրութ, Տպարան Սեւան, 1966:
10. Նկարիչ Ֆէթվաճեանի յորելեանը, *Հայրենիք*, Պոսթոն, 11.10.1923:
11. Նկարիչը եւ «Մանուկ Հայաստան»-ը, *Նոր օր*, Ֆրեզնո, Ալտադենա, 03.07.1923:
12. **Շիշմանեան Ռ.**, Զրանկարիչներու միջազգ. ընկերութեան ցուցահանդէսը, *Վերածնունդ*, Փարիզ, 30.10.1920:
13. Շնորհաւորելի աշխատասիրութիւն մը. մագաղաթի վրայ հայ ձեռագիր գիրքերու գեղարուեստը, *Հայրենիք*, Պոսթոն, 10.1927:
14. **Չեմենյան Գ.**, *Ֆեթվաճյան Արշակ, գեղանկար, գրաֆիկա*, Երևան, ՀԱՊ, հրատ., 2008:
15. **Չեմենյան Գ.**, *Ֆեթվաճյան Արշակ. մշակույթին եղեռնից փրկված ճարտարապետական մասունքներ*, Երևան, ՀԱՊ հրատ., 2015:
16. **Չուգասզյան Լ.**, *Արշակ Ֆեթվաճյան*, Երևան, Փրինթինֆո, 2011:
17. **Պետիկեան Ա. Ա.**, Ֆէթվաճեանի «Նուիրաբերութիւնը», *Պայքար*, Պոսթոն, 27.06.1947:
18. Պ-ն Ա. Ֆէթվաճեանի դասախօսութիւնը, *Հայրենիք*, Պոսթոն, 18.12.1924:
19. **Վաղարշ Վ.**, «Մանուկ Հայաստան», Գեղարուեստական քրոնիկ,

- Հայաստանի Կոչնակ*, Նիւ Եորք, 30.06.1923:
20. **Վերածին Մ.**, Հայաստանի նամակադրոշմներն եւ Ա. Ֆէթվաճեանը, *Հայ Վաստակ*, Պոսթոն, 08, 05.1932:
 21. **Վրոյր Մ.**, Արշակ Ֆէթվաճեան (իր նկարահանողէսին առթիւ), *Հայրենիք*, Պոսթոն, 1932:
 22. **Տէր-Գրիգորեան Ռ.**, Ա. Ֆէթվաճեանի ցուցահանդէսը Պարիզում, *Նոր աշխատարար*, Թիֆլիս, 23.06.1920:
 23. **Քալանթար Նալբանդեան Վ.**, Ֆէթվաճեան ամերիկացիներու մէջ, *Հայաստանի Կոչնակ*, Նիւ Եորք, 12.01.1924:
 24. **Ֆէթվաճեան Ա.**, Գեղարուեստը հայերի մէջ, *Մշակ*, Թիֆլիս, 04.07.1902: =
 25. **Ֆէթվաճեան Ա.**, «Մանուկ Հայաստան»-ի առթիւ, *Հայաստանի Կոչնակ*, Նիւ Եորք, 29.09.1923:
 26. **Ֆէթվաճեան Ա.**, Ի խորոց սրտի, *Զանգ*, Երեւան, 05.01.1919:
 27. **Ֆէթվաճեան Ա.**, Իմ հանդիպումները Խրիմեանի հետ (I), *Հայրենիք*, Պոսթոն, 13.11.1932
 28. **Ֆէթվաճեան Ա.**, Կ. Խաչ պատմութեան համար (Կ. Խաչի 25-ամեակի առթիւ), *Հայրենիք*, Պոսթոն, 06.03.1935:
 29. **Ֆէթվաճեան Ա.**, Մենք մեզ պիտի օգնենք. Հայ հեղափոխութիւնը չի վերջացաւ. Գ., *Յուսաբեր*, Գահիրէ, 05.08.1920:
 30. **Basmadjian K. J.**, Un maitre arménien, Archag Fétvadjan, *L'orient illustré*, Paris, 25.07.1929.
 31. Armenian Architecture, *Glasgow Herald*, Glasgow, 10.11.1921.
 32. Arshag Fetvadjan to Visit America, *The Christian Science Monitor*, USA, 03.08.1922.
 33. Exposition Fétvadjan, *Bulletin arménienne*, 15.10.1919.
 34. Noted artist complies monumental work, Fetvadjan to lecture on archeology. By a staff correspondent of the Hairenik Weekly, *Hairenik Weekly*, Boston, Mass., 06.12.1935.
 35. Fetvadjan gives colorful lecture to A.R.F. students, *Hairenik Weekly*, Boston, Mass., 20.12.1935:
 36. Paintings in Metropolitan work of famous artist who won distinction in Europe. *Leominster daily enterprise*, Leominster, Mass., 18.05.1929.

Նկարների ցանկ

1. Արշակ Ֆեթվաձյան, 1904 թ., Կազանյան լուսանկարչատուն, ՀԱՊ, Հուշաձեռագրային բաժին, © Հայաստանի ազագային պատկերասրահ
2. «Մանուկ Հայաստան», Արշակ Ֆեթվաձյան, 1903 թ., 83x109 սմ, թուղթ, ջրաներկ, ՀԱՊ հավաքածու, © Հայաստանի ազագային պատկերասրահ



1



2